


禪海

王泉子
樂善錄 上下

漢書門			
三	一	五	七
一	二	四	一
一	〇	〇	冊
冊	架	函	號

內閣文庫			
三	一	五	七
七	〇	〇	冊
函	架	冊	架
冊	架	冊	架

內閣文庫			
番號	漢	3157	
冊數	100 (20)		
函號	370	44	



玉泉子

唐

著

明會稽商濬校

裴晉公度為門下侍郎過吏部選人官謂同過給事

曰吾徒僥倖至於此輩優與一資半級何足問


也皆注定未曾限量公不信術數不好服食每

語人曰雞豬魚蒜逢著即喫生老病死時至則行

其器抱弘達皆此類也

裴晉公在中書左右忽白以印失所在聞之者莫不

失色度即命張筵舉樂人不曉其故竊恠之夜半



飲酣左右復白以印存焉度不荅極歡而罷或問
度以其故度曰此出於胥徒盜印書券耳緩之則
存急之則投諸水火不復更得之矣時人服其弘
量臨事不撓

李相德裕抑退浮薄獎拔孤寒於時朝貴朋黨德裕
破之由是結怨而絕於附會門無賓客惟進士盧
肇宜春人有奇才德裕嘗左宦宜陽肇投以文卷
由此見知後隨計京師每謁見待以優禮舊制禮
部放榜先呈宰相會昌二年王起知舉問德裕所

欲荅曰安問所欲如盧肇丁稜姚鵠豈可不與及
第耶起於是依其次而放

盧肇丁稜之及第也先是放榜訖則須謁宰相其導
啓詞語一出榜元者俯仰疾徐尤宜精審時肇首
冠有故不至次乃稜也稜口喫又形體小陋及引
見則俛而致詞意本言稜等登科而稜赭然發汗
鞠躬移時乃曰稜等登稜等登竟不發其後語而
罷左右皆笑翌日友人戲之曰聞君善箏可得聞
乎稜曰無之友人曰昨日聞稜等登稜等登豈非

箏之聲乎

李德裕以已非由科第恒嫉進士舉者及居相位權要束手德裕嘗爲藩府從事日同院李評事以詞科進適與德裕官同時有舉子投文軸誤與德裕舉子既誤復請之曰某文軸當與及第李評事非與公也由是德裕志在排斥

元和初黜八司馬常執誼崖州韓泰處州柳宗元末州劉禹錫朗州韓曄饒州凌準連州程异柳州及咸通中常保衡路巖作相除不附已者十司戶崔

沈循州李瀆繡州蕭連播州崔彥融雷州高湘高州張顏潘州李貺勤州杜裔休端州鄭彥持義州李藻費州內繡州潘州雷州三人不廻初高湜與弟湘少不相睦咸通末旣出高州湜雅與路巖相善見巖陽救湘巖曰某與舍人皆是京兆府荷枷者先是劉瞻志欲除巖溫璋希旨別製新枷數十待之瞻以人情附已不甚緘密其計泄焉故居巖之後湜旣知舉而問巖所欲言時巖以去年停舉已潛奏恐有遺滯請加十人矣卽託湜以五人湜

喜其數寬形於顏色不累日十人勅下湜未之知
巖執詔笑謂湜曰前者五人侍郎所惠也今之十
人其自致之湜竟依其數放焉湘到任憤湜不佑
已嘗賦詩云唯有高州是富家之句焉

路巖出鎮坤維也開遠中衢恣爲瓦石所擊故京兆
尹溫璋諸子之黨也巖以薛能自尚書郎權京兆
府事李贛之舉也至是巖謂能曰臨行勞以瓦礫
相餞能徐舉手板對曰舊例宰相出鎮府司無例
發人防送巖有慚色懿宗晚節朝政多門巖年少

固位邂逅致此一旦失勢當岐路者率多仇隙附
麗之徒釣射時態志在諛媚雷同一詞中外騰沸
其實未然也始巖在淮南與崔鉉作度支使除監
察不十年城門不出而致位卿相物禁太盛暴貴
不祥良有以哉初鉉以巖爲必貴常曰路十終須
與他那一官也自監察入翰林鉉猶在淮南聞之
曰路十如今便入翰林如何得老去皆如所言
鄧敞封敖之門生初隨計以孤寒不中第牛蔚兄弟
僧孺之子有勢力且富於財謂敞曰吾有女弟未

出門子能婚乎當爲君展力寧斬一第乎時敞已
婚李氏矣其父嘗爲福建從事官至評事有女二
人皆善書敞之所行卷多二女筆迹敞顧已寒賤
必不能致騰蹕私利其言許之既登第就牛氏親
不日挈牛氏而歸將及家給牛氏曰吾久不到家
請先往俟卿可乎牛氏許之洎到家不敢泄其事
明日牛氏之奴馱其輜橐直入卽出居常牛氏所
玩用供帳帷幙雜物列於庭廡之間李氏驚曰此
何爲奴曰夫人將到令具陳之李氏曰吾卽妻也

又何夫人爲卽撫膺大哭頃之牛氏至知其賣已
也請見李氏曰吾父爲宰相兄弟皆在郎省縱嬖
不能富貴豈無一嫁處耶其不幸豈唯夫人乎今
願一切與夫人同之夫人縱憾於鄧郎寧忍不爲
二女計耶時李氏將列於官二女方牽挽其袖而
止後敞以秘書少監分司慳吝甚黃巢入洛避
亂於河橋節度使羅元杲請爲副使從事後巢寇
又來與元杲竄焉其金帛悉藏於地中並爲群盜
所得

杜邠公悰爲小兒時嘗至昭應縣與群兒戲於野忽
有一道士獨愛悰以手摩挲曰郎君勤讀書勿與
諸兒戲指其觀曰吾居此頗能相訪否旣去悰卽
詣之但見荒涼他無所有獨一殿巋然存焉內有
老君像初道士半面紫黑色至是詳觀其像頗類
向者所見之道士乃半面爲漏雨所淋故也

夏侯孜與王生同在场屋王生有時價孜且不侔
矣嘗落第偕遊於京西鳳翔連帥館之一日從事
有宴召焉酒酣從事以骰子祝曰二秀才若俱得

登第當擲堂印王生自負才雅如有德色怒曰吾
誠淺薄與夏侯孜同年乎不悅而去孜及第累官
至宰相王竟無所聞孜在蒲津王生之子不知其
故偶獲孜與父平昔所嘗往來筆札累十幅皆孜
手迹也欣然挈之以謁孜孜旣見問其所欲一以
依之卽召諸從事以話其事

崔殷夢瓌宗人瑤門生也夷門節度使龜從之子同
年首冠於瓌瓌白瑤曰夫一名男子飭身世以爲
美也不可以等埒也近歲關試內多以假爲名求

適他處甚無謂也今乞侍郎不可循其舊轍瑤大以爲然一日瓌等率集同年詣瑤起居既坐瑤笑謂瓌等曰昨得大梁相公書且欲先輩一到駿馬健僕往復當不至稽滯幸諸先輩留意瓌以坐主之命無如之何

皮日休南海鄭愚門生春關內嘗宴於曲江醉寢於別榻衣囊書笥羅列旁側率皆新飾同年崔昭符繆之子因蔑視之亦醉更衣見日休謂其素所熟狎者卽固問且欲戲之日休童僕劇前呼之昭符

知日休也曰勿呼之渠方宗會矣以其橐笥皆皮時人傳之以爲口實

日休嘗遊江湖間時劉允章鎮江夏幕中有穆判官者允章親也或諧日休薄焉允章素使酒一旦方宴忽怒曰君何以薄穆判官乎君知身之所來否鸚鵡州在此卽黃祖沉禰衡之所也舉席爲之懼日休雨涕而已

裴助質貌么麼而性尤率易嘗與父坦會飲坦令飛盞每屬其人輒目諸狀坦付助曰矮人饒舌破車

饒契裴勛十分勛飲訖而復盞曰蝙蝠不自見笑
他梁上鷲十一郎十分坦第十一也坦怒答之又
慈恩寺連接曲江京輦勝景每歲新得第者畢列
姓名於此勛嘗與親屬遊見其父及第勝率多物
故謂人曰此皆鬼錄也其輕薄如此

盧隱李峭皆滑帥王鐸之門生前後黜辱者數矣隱
峭物議以爲衽席不脩隱以從兄攜爲相特除右
司員郎右丞崔沆不聽隱上省仍卽見攜於私第
攜未知之欣然而出沆曰員外前日入省時議未

息今復除糾司員外省中固不敢辭他曹惟相公
命携大怒馳入曰舍弟極屈卽當上陳旣上沆乃
求假携卽時替沆官謂人曰吾見丞郎出省郎未
見省郎出丞郎隱初自太常博士除水部員外爲
右丞李景溫揖焉迨右司之命景溫之旨也至是
而遂其志矣是時諫官亦有陳疏者携曰諫官似
狗一個吠輒一時有聲

自敏中爲相嘗欲以前進士侯溫爲子壻且有日矣
其妻盧氏曰身爲宰相願求爲我壻者多矣已旣

姓曰又以侯氏兒爲壻必爲人呼作白侯耳敏中爲之止焉

李相福妻裴氏性妬忌姬侍甚多福未嘗敢屬意鎮滑臺日有以女奴獻之者福欲私之而未果一日乘間言於妻曰某官已至節度使矣然所指使者不過老僕夫人待某無乃薄乎裴曰然不能知公意所屬何人福卽指所獻之女奴也裴許諾爾後不過執衣侍膳未嘗一得繾綣福又囑妻之左右曰設夫人沐髮必遽來報我旣而果有以夫人沐

髮來告者福卽僞言腹痛且召其女奴旣往左右以裴方沐不可遽已卽白以所疾裴以爲信然遽出髮盆中跣問福所苦福旣給以疾爲言卽若不
可忍狀裴極憂之由是以藥投兒溺中進之明日
監軍使及從事悉來候問福卽具以事告之因笑
曰一事無成固當其分所苦者虛咽一甌溺耳聞
者莫不大笑之

楊希古靖恭諸楊也朋黨連結悉相期以死權勢燠
灼力不可拔與同里崔氏相埒而叔季過之希古

性行誕僻初應進士舉投丞郎以所業丞郎延獎
之希古起而對曰斯文也非希古之作也丞郎訝
而詰之曰此舍弟源蟠爲希古所作也丞郎大異
之曰今之子弟以文求名者太半假手也苟袖一
軸投之於先進靡不私自銜鬻以爲莫我若也如
子之用意足以整頓頽波矣性酷嗜佛法常置僧
於第陳列佛事雜以幡蓋是謂道場者每凌晨輒
入其內以身俛地俾僧據其上誦金剛經三遍性
又潔淨內逼如廁必撒衣無所有然後高履以往

相國李石河中未樂有宅庭槐一本抽三枝直過當
舍屋脊內一枝不及相國同堂昆弟三人曰石曰
程皆登宰執唯福一人歷七鎮使相而已蓋一枝
稍短爾

苗胤以進士及第困居洛中有年矣不堪其窮或意
謂將來通塞可以響卜卽命兒姪洒掃廳事設几
焚香束帶秉笏端坐以俟一言所居窮僻久之無
聞日晏有貨枯魚者至焉胤復祝其至而諦聽之
其家童連呼之且挈魚以入其實元無一錢良久

方出貨者遲其出因怒之矣又兒或微剝其魚貨者視之因罵曰乞索兒終餓死爾何滯我之如是耶初鮑嘗自外遊歸途遇疾甚不堪登降忽見輦棺而過者以其價賤卽僦之寢息其中既至洛東門闔者不知其中有人詰其所由來鮑恐其訝已徐荅曰衣冠道路得貧病不能致他輿奈何恠也闔者退曰吾守此三年矣未嘗見有解語神柩後鮑亦終江州刺史

杜羔妻劉氏善爲詩羔累舉不中第乃歸將至家妻卽先寄詩與之曰良人的有竒才何事年年被放迴如今妾已羞君面君到來時近夜來羔見詩卽時而去竟登第而返

趙悰妻父爲鍾凌大將悰以父隨計不第窮悴愈甚妻族益相薄雖妻父母不能不然也一日軍中高會州郡謂之春設者大將家相率列棚以觀之其一妻雖貧不能無佳然所服故弊衆以帷隔絕之設方酣廉使忽馳吏呼將將且懼既至廉使臨軒手持一書笑曰趙悰得非君之婿乎曰然乃告之適

報至已及第矣卽授所持書乃榜也將遽以榜奔
歸呼曰趙郎已及第矣妻之族卽撤去帷幃相與
同席竟以簪服而慶遺焉

李訥除淝東路出淮楚時盧罕方爲郡守訥旣至適
值元日罕命設將送素膳於訥訥初見欣然迨覽
狀乃將名與訥父諱同訥建子也雅性褊急大怒
翌日僅旦已命鼓棹前去罕聞之急命駕而往舟
已行矣罕知其故遜謝良久且言所由以不謹答
之訥去意益堅罕度不可留怒曰大約下人多名

建公何怒之深也遂拂衣而去

溫庭筠有詞賦盛名初從鄉里舉客遊江淮間楊子
留後姚勗厚遺之庭筠少年其所得錢帛多爲挾
邪所費勗大怒笞且逐之以故庭筠不中第其姊
趙顓之妻也每以庭筠下第輒切齒於勗一日廳
有客溫氏偶問誰氏左右以勗對之溫氏遽出廳
事執勗袖大哭勗殊驚異且持袖牢固不可脫不
知所爲移時溫氏方曰我弟年少宴遊人之常情
奈何笞之迄今遂無有成安得不由汝致之遂大

笑久之方得解脫勗歸憤訝竟因此得疾而卒
鄭昌圖登第居長安夜後納涼於庭寔爲人毆擊
擒出春明門至合大路處石橋上乃得解遺其紫
羅履一隻奔及居而寤甚困言於兄弟床前果失
一隻履旦令人於石橋上追尋得之

杜宣猷大夫自閩中除宣城中官之力也諸道每歲
送關人所謂私白者閩爲首焉且多任用以故大
關已下桑梓多係閩焉時以爲中官藪澤宣猷旣
至每寒食節輒散遣將吏荷挈食物祭於諸闕塚

墓所謂洒掃者也故時號爲勅使看墓

故相晉國公王鐸爲丞郎李蟻時判度支每年以江
河淮運至京水陸脚錢計七百京國米價斛四
十議欲令江淮不運米但每百斛納錢七百鐸曰
非計也若於京國糴米且耗京國之食若運米自
淮至京國兼濟無限貧民也糴米之制業已行矣
竟無敢沮其議者都下米果大貴未經旬而度支
請罷以民無至者故也於是識者乃服鐸之察事
矣鐸卒以此大用

賈相耽在滑臺於城北命築八角井以鎮黃河於是
潛使人於鑿所偵之果有一老父來觀問曰誰鑿
此井曰賈相公也父曰大好手但近東近西近南
近北也耽聞之曰吾井太大惜哉

翁彥樞蘇州人也應進士舉有僧與彥樞同鄉出入
故相國裴公坦門下以年老優恤之雖中門內亦
不禁其出入手持貫珠閉目以誦經非寢食未嘗
輟也坦王文柄入貢院子勛質日議榜於私室僧
多處其間二子不之虞也擬議名氏迨與奪逕路

僧悉熟之歸寺而彥樞詣焉僧問彥樞將來得失
之耗彥樞具對以無有成遂狀僧曰公成名須第
幾人彥樞謂僧戲已荅曰第八人足矣即復往裴
氏家二子所議如初僧忽張目謂之曰侍郎知舉
耶郎君知舉耶夫科第國家重事朝廷委之侍郎
意者欲侍郎刻革前弊孤平得路今之與奪悉由
郎君侍郎寧偶人耶且郎君所與者不過權豪子
弟未嘗以一平人藝士議之郎君可乎即屈其指
自首及末不差一人其豪族私讐曲折必中二子

所諱勛等大懼卽問僧所欲且以金帛啗之僧曰
貧道老矣何用金帛爲有鄉人翁彥樞者陡嬰及
第耳勛等卽列丙科僧曰非第八人不可也勛不
得已許之僧曰與貧道一文書來彥樞其年及第
竟如其言一無差忒

常保衡嘗訪同人家方坐有李鉅新及第亦繼至保
衡以其後先匿於帷下旣入曰有客乎同人曰常
保衡秀才可以出否鉅新成事甚自得徐曰出也
何妨保衡竟不之出洎保衡尚主爲相李蟻鎮岐

下鉅新方自山北舊從事辟焉又保衡初旣登第
獨孤雲除西川辟在幕中樂籍間有佐酒者副使
李甲屬意時久以逼於他適私期迴將納焉保衡
旣至不知所之祈於獨孤且將解其籍李至意殊
不平每在宴席輒以語侵保衡保衡不能容卽携
其妓以去李益怒之屢言於雲雲不得已命飛牒
追之而迴無何堂牒追保衡赴闕下乃尚同昌公
主也李固懼之矣不日保衡復入翰林李聞之登
時而卒

崔鉉元畧之子京兆參軍盧甚之死鉉之致也時議
冤之鉉子沆乾符中亦爲丞相黃巢赤其族物議
以爲甚之報焉初崔鉉雖諫官婚姻假迴私事
也甚雖府職乃公事也相與爭驛廳甚既下獄與
宰相書則以已比孟軻而方瑄錢鳳旣朋黨宏大
莫不爲之盡力甚出於卑微加以鉉亦瑄之門生
方爲宰相過而誣罔瑄曰左補闕出爲翟陽宰甚
行及長樂坡賜自盡中使適迴遇瑄囊出其喉曰
此盧甚結喉也瑄甚不憚京城不守崔氏諸子並

血其族嗚呼謂天蓋高何其明哉

鄭路昆仲有爲江外官者維舟江渚群盜奄至卽以
所有金幣羅列岸上而任盜賊自運取賊一不犯
曰但得侍御小娘子來足矣其女有姿色賊潛知
之矣骨肉相顧不知所以荅女欣然請行其賊卽
取小舟載之而去女謂賊曰君雖爲偷得無所居
與親屬乎然吾家衣冠族也旣爲汝妻豈以無禮
見逼若達汝所止一會親族以託好逑足矣賊曰
諾又指所偕來二婢曰公旣以偷爲名此婢不當

爲公計不若歸吾家賊以貌美詞且順顧已無不
可者卽自鼓棹載二婢而去女於是赴江而死
劉蕢楊嗣復門生也對策以直言忤時中官尤所嫉
忌中尉仇士良謂嗣復曰奈何以國家科第放此
風漢耶嗣復懼而荅曰嗣復昔與劉蕢及第時猶
未風耳

杜羔字中立少年時贍於財產宅無所求其所與遊
者徒利於酒肉其實蔑視之也一日同送迎於城
外逆旅客有善相者歷觀諸賓侶獨指中立曰此
子異日當爲將矣一座大笑中立後尚真源公主
竟爲滄州節度使初李琢之出鎮旗竿道折乃鑿
殺其執旗者中立在道亦然杖之二十琢竟無患
而中立卒焉豈煞之可以應其禍哉

李蟻與王鐸進士同年後居得路嘗恐鐸之先相而
已後之路巖出鎮益失勢鐸柔弱易制中官愛焉
洎常保衡將欲大拜不能先於恩地將命鐸焉蟻
陰知之挈一壺酒請鐸曰公將登庸矣吾恐不可
以相攀也願先是少接左右可乎卽命酒飲鐸妻

氏疑其董焉使女奴傳言於鐸曰一身可矣須爲
妻兒謀嬪驚曰以吾酒爲鳩乎卽命一大爵自引
滿飲之而去

牛庶錫性靜退寡合累舉不第貞元元年因問日者
君明年狀頭及第庶錫但望偶中一第殊不信也
時已八月未命主司偶經少保蕭昕宅前值昕策
杖獨遊南園庶錫遇之遽投刺并贄所茶昕獨居
方思賓客甚喜延之語及省文卷再三稱賞因問
外議以何人當知舉庶錫對曰尚書至公爲心必

更屈領一歲昕曰必不見命若爾君卽狀頭也庶
錫起拜謝坐未安忽聞馳馬傳呼曰尚書知舉昕
遽起庶錫復再拜曰尚書適已賜許皇天后土實
聞斯言昕曰前言已定矣明年果狀頭及第

故相盧携爲監察御史中丞歸仁紹上初日傳語携
曰昔自浙東推事迴鞞袋中何得有綾三千匹請
出臺後自郎官除洛陽縣令改鄭州刺史以諫議
入至京除兵部侍郎携自洛陽至相臺百數日日
間何不見歸侍郎或對之云自相公大拜請假携

卽除仁紹兵部尚書人情大洽

進士李昭蝦舉十上不第時登科年已有主司並無
薦託之地主司晝寢忽寤見一軸文卷在枕前看
其題處乃昭蝦之卷令選於架上復寢暗視有一
大鼠取其卷啣其軸復還枕前再三如此昭蝦來
春及第主司問其故乃三世不養猫皆云鼠報

魯國公孔緯入相後言於甥姪曰吾頃任兵部侍郎
與王晉公鐸充弘文館學士判館事上後巡廳謝
晉公公乃言曰余昔任兵部侍郎與相公杜邠公

悰充弘文館學士判事暮春留看牡丹於新廳內

杜曰此廳比令無逸

無逸邠國之元子降州刺史

修之止要一

間今壯麗如此殊不知非久須爲灰燼余聞此言
心常銘之又語余曰明公將來亦據此坐猶或庶
幾由公而下者罹其事矣以吾觀之則邠公之言
其大槩驗矣時昭宗纂承孔緯入相朝廷事體掃
地無餘故緯感昔言而傷時也

馬惣爲天平軍節度使暇日方修遠書時術人程居
在旁惣隱几忽若假寐而神色慄慄不類於常程

不敢驚乃徐起詣其左相元封語之俄而召元封
屏人謂曰異事異事某適所詣嚴邃崇宏王者之
居不若也爲人道前見故杜十文司徒笑而下階
迎曰久延望甚喜相見因留連曰佑之此官亦人
世中書令耳六合之內靡不關聞久處會劇心力
殆倦將求賢自代公之識度誠克大用况親且故
所以奉邀敬以相授惣固辭至於泣下良久杜乃
曰旣未願則且歸矣然二十年當復相見惣旣寤
大喜其壽之遐遠自是後二年而薨豈馬公誤聽

抑姑增年以悅其意耶

李克勤爲大理卿昭宗在華州時鄭縣令崔鑾有民
告舉放絕絹價刺史韓建令計以爲賊奏下三司
定罪御史臺刑部奏罪當絞大理寺數月不奏建
問李尚書崔令乃親情耶何不奏克勤曰裨公之
政也韓云崔令犯賊奈何言我之過也李云聞公
舉放將數萬矣韓曰我華州節度使華州民我民
也李曰華民乃天子之民非公之民若爾則鄭縣
民乃崔令之民也建服其論乃捨崔令罪止責授

穎陽縣尉

舉人李文彬受知於舍人紇于洎有同時今京兆府司錄賀蘭洎卒彬因謁紫微問今日有何新事對曰適過府聞紇于洎卒洎曰莫錯否彬曰不錯洎曰君又似共鬼語也拂衣而入彬乃悟蓋俱重姓又同名而誤對也

省郎張廷之有疾過詣趙鄂胗胗說其疾宜服生薑酒一盞地黃酒一盃仍謁梁新說與鄂皆同過此卽卒自飲此酒後所疾尋平他日爲時相邀飲堅

虐百盃訴之不及其夕卒時論謂之二妙

呂元膺爲東都留守常與處士對碁之次有文簿堆擁元膺方秉筆閱覽碁侶謂呂必不顧局矣因私易一子以自勝呂輒已窺之而碁侶不悟翌日呂請碁處士他適内外人莫測碁者亦不會仍以束帛贖之如是十年許呂疾亟命兒姪列前曰遊處交友爾宜精擇吾爲東都留守有一碁者云云吾以他事俾去當日一碁子亦未足介意但心迹可畏亟言之慮其憂畏終不言又恐汝輩滅裂於知

聞言畢惘然長逝

夏侯孜爲左拾遺常着桂管布衫朝謁開成中文宗無忌諱好文問孜衫何太麤澁具言桂管產此布厚可以禦寒他日上問宰相朕察拾遺夏侯孜必貞介之士宰相曰其行今之顏冉上嗟嘆亦効着桂管布滿朝皆倣之此布爲之驟貴也

李德裕退朝多與親表裴璟破體笑語詢以新事李問更有何說裴云別無新事但昨日坡下郎官集送某官出牧湖州飲餞郵亭人客甚衆有倉部白

員外未至崔駢郎中作錄事下籌白自以卑秩人乘凌競更固辭上次酌四大器白連飲三器訖飲一器持之而請第四器名崔郎中云亦別無事但何必要到處出頭惱白踉蹌仆於下座竟不飲而去坐中有笑者有縮頭者但不知此官人今日起得未李大怒曰何由可奈第斯言果有之乎曰固然又問第知白員外所止否璟曰知其某坊某曲李曰爲某傳語曰員外請至宅白捧命又憂恐比至李曰久欲從容中外事屏然旬朔不要出人事

既而白授翰林學士崔駢汾州刺史續改洛州刺史流落外不復更遊郎署終鴻臚卿

李德裕在中書嘗飲惠山泉自毘陵至京置遞鋪有僧人詣謁德裕好奇凡有遊其門者雖布素皆接引僧白德裕曰相公在中書昆虫遂性萬彙得所水遞一事亦日月之薄蝕微僧竊有感也敢以上謁欲沮此可乎德裕頷之曰大凡爲人未有無嗜者至於燒汞亦是所短况三惑博塞弋奕之事弟子悉無所染而和尚不許弟子飲水無乃虐乎爲

上人停之卽三惑馳騁怠慢必生焉僧人曰貧道所謁相公者爲足下通常州水脉京都一眼井與惠山泉脉相通德裕大笑曰真荒唐也曰相公但取此泉脉德裕曰井在何坊曲曰昊天觀常住庫後是也因以惠山一鬣昊天一鬣雜以八鬣一類十鬣暗記出處遣僧辨折僧因啜嘗取惠山昊天餘八瓶同味德裕大加竒嘆當時停水遞人不告勞浮議乃弭

崔蠡知制誥丁太夫人憂居東都里第時尚苦儉嗇

四方寄遺茶藥而已不納金帛故親賓至家不異
寒素雖名姬愛子服無輕細崔公卜兆有期一日
宗門士人請謁於蠡聞吏拒之告曰公居喪未嘗
見他客乃曰某崔家宗門子弟又知尊夫人有卜
兆之日願一見公公聞之延入與語直云知公居
縉紳間清且儉太夫人喪事所須不能無費某已
忝孫姪之行又且資貨稍給願以錢三百萬濟公
大事蠡見其慷慨深竒之但嘉納其意終却不受
此人調舉久不第亦頗有屈聲蠡未幾服闋拜尚

書左丞知舉禮部此人就試蠡第之爲狀元衆頗
驚異謂蠡之主文以公道取士崔之獻藝由善價
成名一第可矣首冠未可以是人有詰於蠡者荅
曰崔某固是及第人但狀頭是其私恩所致耳以
前事告之於是中外始服名益重焉

崔珙爲東都留守判尚書省事中書舍人崔荆爲庶
子分務謁珙珙不爲見荆乃求與珙素善者使候
問之怒不已他日因酒酣復詰之居守益忿曰誓
不與此人相面且人爲文詞言語豈可以珙兄弟

作假對耶荆終不諭親族咸憂慄不安甥姓中有
穎悟者探取荆文集評之乃掌制日貶崔球爲撫
州邵丞云夤緣鴈序鼓扇澆風荆因爾感疾

劉瞻之先寒士也十歲許在鄭綱左右主筆硯至十
八九綱爲御史西巡荆部商山歇馬亭俯瞻山水
時雨新霽巖嵐竒秀泉石甚佳綱坐久起行五六
里曰此勝槩不能吟咏必晚何妨卽停於亭欲題
詩顧見一絕染翰尚濕綱大訝其佳絕時南北無
行人顧左右但向來劉景在後三二里公戲之曰

莫是爾否景拜曰實見侍御吟賞起予輒有寓題
引咎又拜公咨嗟久之而去比迴京闕戒子弟涵
瀚已下曰劉景他日有竒才文學必超異自此可
令與汝共處於學寢饌一切無異爾輩吾亦不復
指使至三數年所成文章皆詞理優壯凡再舉成
名公召辟法寺學省清級及生瞻及第

杜黃裳知貢舉聞尹樞時名籍籍乃微服訪之問場
中名士樞唯唯黃裳乃具告曰某卽今年主司也
受命久矣唯得一人其他相煩指列樞聳然謝曰

既辱下問敢有所隱卽言子弟崔元略孤寒有材
藻令狐楚數人黃裳大喜其年樞狀頭及第試珠
還合浦賦成或假寐夢人告曰何不序珠來去之
意既寤乃改數句及謝恩黃裳謂之曰序珠來去
之意如有神助

李回之爲御史中丞也時會昌中王師討昭義久未
成功賊之遊兵徃徃散出下剽掠荆洛懷孟又發
輕卒數千僞爲群臣散漫山谷以啗官軍官軍自
遠見之乃分頭掩捕因不成列且無備焉於是短

兵接鬪蹂踐相乘凡十數里王師大敗是月東都
總統王宰石雄皆堅壁自守武宗坐朝不怡召宰
相李德裕等謂之曰王宰石雄不與朕殺賊頻遣
中使促之尚聞逗撓依違豈可使賊黨坐至東都
耶卿今日與朕晚歸別與制置軍前事宜奏來時
宰相陳夷行鄭肅拱默聽命德裕至中書召御史
中丞李回具言上意曰中丞必一行責戎師蚤見
成功慎無違也回刻時受命於是具名以聞曰今
欲以御史中丞李回爲催軍使不能盡知敢以爲

請帝曰可卽日本回自右銀臺戒路有邸吏五十
導從至于河中援轡以進俟王宰等至河中界迎
候召行二帥至翼城東道左執兵如外府列校迎
候儀回立馬受起居寒溫之禮二帥復前進數步
磬折致詞回擊鞭亦不甚顧之禮成二帥旁行俛
首俟命回於馬上厲聲曰今日當直令吏安在郡
吏躍馬聽命回曰責破賊限狀來二帥鞠躬流汗
而退請以六十日破賊過約請行軍中令於是二
帥大懼親率軍鼓之士卒齊進凡五十八日拔潞
城梟劉稹首以獻功成回復命後六十日由御史
中丞拜中書侍郎平章事

李業之舉進士因下第過陝虢山路阻暴雨投村舍
避之隣里甚遠村家只有一小僮看舍業牽驢庇
於簷下時左軍李生與行官楊鎮亦投舍中李有
一馬相與入止舍內及稍霽已暮矣小童曰阿翁
卽欲歸不喜見客可去矣業謂曰此去人家極遠
日勢已晚固不可前去也須臾老翁歸見客欣然
異禮延接留連止宿旣曉懇留欲備饌業已謝媿

再三言曰孫子云阿翁不愛客某又礙夜前去不
得甚憂恠乃不意過禮週旋何以當此公曰某家
貧無以待賓慚於接客非不好客也然三人皆節
度使某何敢不祇奉耶業曰三人之中一人行官
爾言之過矣老翁曰行官領節鉞在兵馬使之前
秀才節制在兵馬使之後然秀才五領節鉞勉自
愛也業既數年不第從戎幕矣楊鎮爲仇士良開
府擢用累職至軍使除涇州節度使李與鎮同時
爲軍使領邠州節度使業且討党項功除鎮武汾

涇凡五鎮麾鉞一如老翁之言

丞相鄒平公段文昌負才傲俗落泊荆楚間嘗半酣
鞞履於江陵大街往來雨霽泥甚街側有大宅枕
渠公乘醉於渠上脫履濯足旁若無人自言我作
江陵節度使必買此宅聞者皆笑其後果鎮荆南
遂買此宅

文昌又嘗佐太尉南康王常臯爲城都館驛巡官忽
失意臯逐之使作靈池尉羸童劣馬奔迫就限去
靈池六七里已昏黑路絕行人忽有兩炬前引更

王泉子
呼曰太尉來就及郭門兩炬皆滅先時常臯奏使
入長安素與劉禹錫深交禹錫時爲禮部員外郎
與日者從容文昌入謁日者匿於簾下旣去日者
謂禹錫曰員外若圖省轉事勢殊遠須待十年後
此客入相方轉本曹正郎爾自是禹錫失意連授
外官十餘年文昌入相方除禹錫吏部郎中

崔湜爲中書令張嘉貞爲舍人湜輕之嘗呼爲張底
後曾量數事意出人右湜驚羨久之謂同列曰知
否張底後乃我輩一人此終是坐處湜死後十餘

年河東竟爲中書令

李抱真之鎮潞州軍資匱缺計無所出有老僧大爲
郡人所敬服抱真因請之曰假和尚之道以濟軍
中可乎僧曰無不可抱真曰但言請於鞠場焚身
某當於使宅鑿一地道通連俟火作卽潛以相出
僧喜從之遂陳狀申言抱真命於鞠場積薪貯油
因爲七日道場晝夜香燈梵唄雜作抱真亦引僧
入地道使之不疑僧乃升坐執鑪對衆說法抱真
率軍僚屬及將吏膜拜其下以俸入檀施堆於其

旁由是士女駢闐捨財億計滿七日遂送柴積灌
油發焰擊鐘念佛抱真密遣人填塞地道俄頃之
際僧薪並灰數日籍所得貨財輦入軍資庫別求
所謂舍利者數十粒造塔以貯焉
長興于相棕與舉人裴丘友善丘有一古鏡所常寶
者琮布素時曾一照分明見有朱衣吏導從他皆
類此其鏡旋亦墜矣

宣平盧太傅應舉時寄居專州安豐縣別墅嘗遊芍
陂見里人負薪者持碧蓮花一朵已傷器刃矣言

陂中得之盧公後從浙西回使淮復話於相國李
德裕令搜訪芍陂則無有矣又遍尋於江渚間亦
終不能得乃知向者一朵蓋神異耳

集賢韓景名父之子雖教有方而性頗暗劣及爲校
理史傳中見說金根車處皆臆斷之曰豈其悞歟
必金銀車悉改根字爲銀字至除拾遺果有諫院
不受

牛僧孺鎮襄州日以久旱祈禱無應有處士衆云豢
龍者公請致雨處士曰江漢間無龍獨一湫洎中

有之果龍也強駟之必慮爲災難制固命之果有
大雨漢水泛溢漂溺萬戶處士避罪亦潛去十年
有人於他處見猶在

杜紫微頃於宰執處求一小儀不遂請小秋又不遂
嘗夢人謂曰辭春不及秋昆脚與皆頭後果得比
部員外

會昌末年武宗忽改御名爲火下大及宣宗以光王
龍飛於古文光字實從火焉噫先兆之明若是耶
又宣宗在藩邸嘗從駕迴而誤墜馬人不之覺比二

更方能興時天大雪四顧悄無人聲上寒甚巡警
吏至大驚上曰我光王也不虞至此方困且渴若
爲我求水警者卽於傍近得水以進遂委而去良
久起舉甕將飲顧視甕中水盡爲芳醪矣上獨喜
自負一舉甕已而體微煥有力步歸藩邸後卽帝
位

裴均僕射之鎮襄州也鄭滑館驛巡官裴弘泰光聘
至驛值彼大宴客司漏名及設定令人召屈遂奔
至均大不悅因責之曰君何後來大涉不敬時酒

已數籌弘泰曰都不見客司報宴非敢怠慢然叔
父檢罪請盡飲在坐器物仍欲乞飲盡賜弘泰上
件器物可否合坐皆壯之均亦許弘泰弘泰遂次
第揭銀器飲之飲訖卽寘懷中須臾盈懷盤中餘
一銀醢受一斗已上其酒亦滿弘泰捧之而飲均
亦令人吏去醢覆中飲訖踏其醢抱之而出請壯
索馬歸驛均以弘泰飲酒必過量所傷憂之使吏
問飲後所宜使者方見弘泰戴紗帽於廳上秤器
物正重二百餘兩均不覺大笑迴車贈賞甚厚

太保令狐相絢出鎮淮海日友使班蒙與從事俱遊
大明寺之西廊觀前壁所題云一人堂堂二曜同
光泉深尺一點去冰傍二人相連不欠一邊三梁
四柱烈火而然除却雙勾兩日諸寮佐幕顧駐足
久之莫能辨解獨班蒙曰一人豈非大字乎二曜
者日月非明字乎尺一者十一寸非寺字乎點去
冰傍水字也二人相連天字也不欠一邊下字也
三梁四柱而烈火無字也兩日除雙勾比字也得
非大明寺水天下無比乎衆皆洗然曰黃絹之奇

王集子
智亦何異哉歎矣彌日詢之老僧曰頃年有客獨
遊題之而去不言姓氏

軋符未有客寓止廣陵開元寺因文會話云頃在京
寄青龍寺日有客嘗訪知寺僧屬其忽遽不暇留
連翌日至又遇要地朝客後至復來復阻他日頗
有怒色題其門而去龕龍東去海時日隱西斜敬
文今不在碎石入流沙僧皆不能詳有沙彌頗解
眾問其由曰龕龍去有合字存焉時日隱有寺字
仔焉敬文不在有苟字存焉碎石入沙有卒字存

焉此不遜之言辱我曹矣僧大悟追訪杳無蹤矣
客云合寺苟卒沙彌乃懿皇朝雲皓供奉是也

昔有人授舒州牧李德裕謂之曰到彼郡日天柱峯
茶可惠三角其人獻之數十斤李不受退還明年
罷郡用意精求獲數角投之德裕閱而受曰此茶
可以消酒食毒乃命烹一甌沃於肉食內以銀合
閉之詰旦因視其肉已化爲水衆服其廣識

京輦自黃巢退後修葺殘毀之處時定州有兒俗號
王酒胡居於上都巨富納錢三十萬貫助修朱雀

門昭宗又詔重修安國寺畢親降車輦以設大齋
乃扣新鐘一撞捨錢一萬貫命大臣請各取意而
擊上曰有能捨一千貫文者卽打一槌齋罷王酒
胡半醉入來逕上鐘樓連打一百下便於西寺運
錢十萬貫入寺

常保衡欲除裴修爲省郎時李章爲左丞常先遣盧
望來申意探其可否李曰相公但除不合先問某
盧以時相事權設爲所沮則傷盛重因勸常勿除
郎中

南卓與李修古親表昆弟李性迂僻卓嘗輕之李俄
受許州從事奏官勅下時許帥方大讌忽遞到開
角有卓與李書遂執書喜曰某與南卓二十三表
兄弟多蒙相輕今日某忝爲尚書賓幕又奏署勅
下遽與某書大竒及啓封云卽日卓死老不死生
見李修古上除自帥請書合坐大笑修古大慙
鄭文公畋字台文父亞曾作容管觀察使畋生於桂
州小字桂兒時西門思恭爲監軍有詔徵赴闕下
餞於北郊自以衰年因以畋託曰他日願以桂兒

爲念九泉之下不敢忘之言訖泫然流涕思恭誌
之及神策軍中亞巴卒思恭使人召畋館之於第
年未及冠甚愛之如甥姪因選師友教導之畋後
官至將相黃巢之入長安思恭逃難於終南山畋
以家財厚募有勇者訪而獲之以歸岐下溫清侍
膳有如父焉思恭終於畋所畋葬近西門墳陌皆
造二壟焉吊者無不墮淚咸伏其義也

崔郢爲京兆尹日三司使在永達亭子宴丞郎崔乘
醉突飲衆人皆延之時譙公夏侯孜爲戶部使問
曰尹曾任給舍否崔曰無譙公曰若不曾歷京
兆尹不合衝丞郎宴命酒糺來要下籌且喫
爵取三大器物引滿飲之良久方起決引馬將軍
至斃崔出爲賓客分司

鄭餘慶清儉有重德一日忽召諸朋朝官數人會食
衆皆朝僚以故相重望皆凌晨詣之至日高餘慶
方出閑話移時諸人皆囁然餘慶呼左右曰處分
厨家爛蒸去毛勿拗折項諸人相顧以爲必蒸鵝
鴨之類遂巡昇擡盤出醬醋亦極香新良久就食

人前下粟米飯一碗蒸葫蘆一枚相國食美諸人
強進而罷

文宗命中使宣兩軍中尉及諸司使內官等不許著
紗縠綾羅布其後駙馬常處仁冠布夾羅巾以進
上曰本慕卿門戶清素故俯從選尚如此巾服從
他諸戚爲之卿不須爲也

淮南節度使王播以錢十萬賂遺恩倖求鹽鐵使
諫議大夫獨孤朗張仲方起居郎孔敏行柳公權
起居舍人宋申錫補闕楊仁實劉敦儒拾遺李

讓薛延老等十人前一日詣延英抗論其事後之
有遷其途實繁自宰相翰林學士三司使皆有定
價因此致位者不少近又縣令錄事參軍亦列肆
鬻之至有白身便爲宰相者然所至多爲四方諸
侯不放上以知其來也俾不遵王命抑有由焉
豈時之重利耶抑諫省任非其人耶未嘗以一字
整頓頹綱深所未喻

裴冕代杜鴻漸秉政小吏以俸錢文簿白之冕顧子
弟喜見於色其嗜財若此冕性本侈靡好尚車服

名馬數百金者常十匹每宴賓客滋味品極坐客
有味於名者

崔安潛東洛掌選人有不能顯其姓名竊顧雲啟事
投獻者崔公不之知大賞嘆召之與語便注一起
資縣令後有人白之崔公方悔

馮蕘給事親仁坊有宅南面山亭尤多養鵝鴨及雜
禽之類極多常遣一家人掌之時人謂之雀省

鄭光除河中節度宣宗問曰卿在鳳翔使官先是何
人曰馮三上不之會樞密使奏曰是馮袞臣曾充

使至彼知之工曰便與馮三爲副使及罷河中歸
又詔對曰卿在河中斷大事時如何光對曰臣須
開始得又更對他事曰不得臣須裂始得上笑後
朝臣每遇延英入閣使對多以開裂爲號時裴司
諫郎中爲節判頃客於河中到使院裴曰某在身
官爵爲尚書削盡所謂不以本官呼之也

光在河中日遇國忌行香便與判官及屈客寺中宴
飲徵令時薛起居保遜爲客在坐光把酒曰某改
令身上取一果子名脆臍他人皆盡思不得至薛

乃還令曰脚杏滿坐皆大笑

李據宰相絳之姪生長綺紈曾宰字於澗池皆以門
廕也不知書因節歲索魚不得怒追漁師云緣獺
暴不敢打魚判云俯臨新歲猛獸驚人漁網至寬
踈而不漏後又祇承人請假狀後判云白日黃昏
須到夜即平明放歸祇承人並不敢去又判決祇
承人云如此痴頑豈合喫杖五下或語據曰豈合
喫杖不合喫杖也李曰公何不會豈是助語共之
者也何別哉

玉泉子終

樂善錄卷上

宋 李昌齡著 明會稽商濬校

劉承勳事江南為德昌宮使李氏金帛多在德昌文
簿淆亂不可勾考劉既專宮事乃盜用無算侍妾
數百富於一時及李氏歸朝劉失職破敗晚年乞
食街中凍餒而死方其富貴之時安知有今日事
潘謨修言江南之平建州也大將余洪敬妻鄭氏有
色身為亂兵所獲獻于裨將王建峯王逼以非禮
鄭志不可奪脅以白刃亦不屈又命引所掠歸婦

樂善錄
卷上
女殺一人以食謂鄭曰汝懼乎鄭曰此身願早充
君庖誓不可以非禮汚王竟不忍殺以獻大將查
文徽查將以薦枕鄭大詈曰王師吊伐義夫節婦
宜加旌賞王司徒出於卒伍固無足恠君侯知書
爲國上將當有以表率群下風化遠方乃欲加非
禮于一婦人以逞欲乎願速見殺查大慚求其夫
而付之夫鄭氏節操凜凜雖二將虎狼終不可犯
有臨南海太守見配崖州人例以三百爲率過其數
則投先到者於海乃奏白於朝云所以不殺而宥
之遠方者欲生之也今推之於海是復殺之矣不
若量移先到者入內地以彰朝廷不殺之德上亦
感悟遂可其奏

盧多遜貶朱崖李符白趙普曰朱崖雖在海外水土
不甚惡春州近在內地至者無生還宜以多遜改
竄春州外示台座寬貸而實置之必死之地普不
荅後符坐事貶出上欲再貶嶺外普遂上以符知
春州到任未浹旬而卒

周世宗性慘急果於殺戮有忤旨者魏仁溥皆歸罪

於已以營救之賴全活者十七八人淮南之役所
獲敗卒九千人仁溥從容白以隸軍鋒刃之下無
橫死者魏雖起自刀筆終能致位丞相與夫歸罪
於人以逃責者豈不相遠其貴顯也宜哉

何仙姑在世間時一主簿忽得天書字不可識以問
仙姑姑曰天書言主簿受金十兩折祿五年

曹彬攻金陵與諸將焚香爲誓曰克城之日幸無妄
殺一人明日城下按堵如故曹翰克江州念其城
不下屠之而彬之子孫至今貴盛翰死未三十年

子孫有乞丐於海上者夫二將成功雖一然用心
相遠故其報亦異

安州司法秦光亨者方在母胎時其舅陳遵兩夕連
夢一小兒挽其衣若有所告其狀甚急遵寤而思
曰姊方孕且產期伊邇豈意不樂多子而欲殺是
兒耶馳往視之則兒果已覆在水盆中矣遵救之
乃免

江南李後主獵於青龍山一牝狙墮網見主雨淚屢
指其腹若有所告主大恠戒虞人守而勿殺是夜

果生二狙

蔡順事母以孝聞母死未葬適里中火災順伏棺號
哭火乃越燒他室古初父喪未葬鄰家失火初匍
匐柩上以身扞火火爲之滅廉范其父死於蜀范
迎父喪歸葭萌載船觸石破沒范抱棺浮沉人鈎
求得之療救僅免三人一念爲親雖踏水赴火猶
不爲害信哉孝德之可以感通神明也如此
竇禹鈞年二十未獲嗣夜夢祖父謂曰汝年過無子
又壽不永當早脩陰德禹鈞唯諾家僕盜用數百

千錢懼事發遂遁寫券繫女臂曰賣此女以償欠
公憫而嫁之僕感泣歸訴前罪公置不問由是圖
公像日焚香以祝公年又嘗入佛寺得遺銀二百
兩金三十兩黎明復入院以伺失者果一人涕泣
而至公問其故曰爲父犯大辟遍告諸親貸得此
物用贖父罪昨暮失去不復贖矣公驗實還之更
有所贈又內外姻婭有喪不能舉有女不能嫁者
公一切周旋歲之所入除伏臘供給外皆以周急
家尚儉建書院四十間藏書萬卷延文行師儒有

志於學者聽其自至是以由公門而貴者前後接
武公歷官至左諫議大夫致仕義風家法實一時
標準生五子並登第儀禮部尚書儼禮部侍郎侃
左補闕偁叅知政事偕起居郎

王延範爲左道所惑任廣西轉運日常寓書左拾遺
常務昇作隱語諷朝廷事一日以事杖張知霸知
霸憾之知延範與知州徐休復不協遂詣知州告
其事徐以聞奏太宗遣內侍聞承翰會副使李瑄
與徐雜鞠之抵罪籍收其家藁葬南海城外墳土

色如紫織草不生禽鳥不泊後徐知潞州白日上
廳忽見延範發弩射之矢自頸出於頤驚呼走入
是夕瘍生於頰旬餘潰而卒

趙韓王曾久病無生意解所寶雙魚犀帶遣親吏甄
潛詣上清太平宮醮謝往咎道士姜道玄爲公叩
幽都乞神語神曰趙某開國忠臣奈何冤累不可
避姜又叩乞寃者爲誰神以淡墨一巨牌示之濃
烟罩其上但識牌末火字而已道玄以告公曰我
知之矣必秦王庭姜也當時自是渠與盧多遜遣

堂吏趙白交通事露速禍咎豈在吾嗚呼一聞火
字乃知必是秦王心下事其可打過

王清化修西太乙宮有古塚在其北欲毀之一道士
再三乞勿毀清化遂止是夕其道士感夢一大官
召謝之不數日遂賜紫人有平夷塚墓以廣園宅
者豈獨無禍張十五本衣冠後園中有一古墓張
貧發取其物夜聞語云有少物幾被劫去張次日
又畢取銅鏡等物因茲日號叫殺人遂患腫毒死
謂枯骸無知可乎

孫承祐吳越王妃之兄貴近用事每一小飲殺命數
萬取鯉魚腮肉爲臠坐客數十皆足圈鹿數百庖
人不暇斷唯旋割取鮮腴以供膳一食炙凡二十
品設十銀鑊構火以次薦之王常以大片生龍腦
十斤賜承祐承祐對使者索大銀爐作一聚焚之
曰聊以祝王壽及歸朝爲節度使俸入有節無復
向之豪侈然卧內每夕焚燭二炬燃龍腦二兩征
范陽頓城下鱸魚召諸帥食水陸咸備性嗜魚作
一黑漆大水斛貯水養魚令役夫擔負以從但恣

口腹不計其費死不數年子孫皆乞丐多餓死者
楊文公手記其事因錄出以爲豪侈者戒

寇萊公自少年富貴不點油燈尤好夜宴劇飲雖寢
室亦燃燭達旦杜祁公爲人清儉在官未嘗燃官
燭油燈一炷熒然欲滅與客相對清談而已二公
皆名臣而奢儉不同然祁公壽考終吉萊公晚年
有南遷之禍遂歿不返雖其不幸亦可爲戒

裴度屢黜場屋相者謂曰公形神稍異若不貴必餓
死公一日遊香山寺見一婦人致緹繒於僧伽欄

楯之上祈禱良久不取而去公知其志追之不及
待亦不至公彘以歸遲明復徃候之其婦人果來
公問其故婦人曰父以罪被繫昨告人得一玉帶
二犀蒂以賂津要不幸失去不測之禍父無所逃
矣公遂還其物婦人願留半公亦不受後數年相
者見之大驚曰公陰德及物前程萬里非吾術之
所能知也

劉洪欽家大富相者謂曰更三年子大期至矣劉甚
恐後因嫁女求從得一妾極殊麗名蘭孫詰其家

世乃洛人父官淮西以衣冠家被俘掠劉太息曰
是忍置於使令之列耶先其女嫁之劉竟老壽

鍾輻年少負才傲物樊若水愛其才妻之以女女亦
才質雙盛輻登第方得意買一妾自侍命曰青箱
所在狂放久不歸一日過城邑令延留飲於樓上
輻醉卧忽夢其妻以一詩怨責曰楚水平如練雙
雙白鳥飛金陵幾多地一去不言歸翌日輻歸至
采石妾忽暴死及抵家樊已死數月矣物故之夜
乃輻夢於縣樓之時

昔太學二士人同年月日時生又同年發解過省二
人約受相近差遣庶彼此得知灾福故一人授鄂
州教授一人授黃州教授未幾黃州教授死鄂州
教授爲占後事於柩前祝曰我與公生年月日時
同出處又同公先捨我去使我今卽死已後公七
日矣若有靈宜託夢以告其夜果夢告云我生於
富貴已享用過了故死公生於寒微未曾享用故
生以此知人之享用亦不可過後鄂州教授歷官
至典郡豈非聞此警悟恐懼修省而然耶

張商英監荆南鹽院時周師厚為湖北提舉布供給
 酒數十瓶陰俾張賣之張以告察訪蒲宗孟蒲劾
 其事周坐是降官後數年張為館職囑舉子于判
 監舒亶繳奏其簡張亦坐是奪官

潭倅張著奉時祀于南嶽舊制就壇設位敷席於地
 陳籩豆牲醴之品當敷席之際著以一足指畫祀
 罷還府墜馬折足而卒

節娥洪推貧倡郝氏女也生數歲鬻於趙氏為養女
 既長而艷郝復奪之女曰願荼蠶織以奉甘旨誓

無污我俄有少年有厚利授郝郝百計誘娥娥不
 許一日出郊飲以酒欲強之娥悲泣終不辱會過
 橋投河而死郡將呂公義之因以節娥名其渡噫
 娥生長倡家乃能堅白自守死而不悔人非倡女
 而不能以禮自防者視娥得無愧耻

事見節
 娥渡記

查道母病思食鱖魚方冬無有市者道泣禱河神水
 開得魚尺許以饋後舉賢良中第四等李虛已母
 喪明醫者謂浮翳泊睛舌舐千日勿藥自痊虛已
 舐睛二年母睛遂明李行簡父患癰極痛楚行簡

吮敗膏不唾於地父疾遂平真宗一日令馮元談
易欲得純孝三數人如同人便裘頂帽橫經並坐
削進說之儀元遂以道等奏立召之俾日陪侍識
者曰爲至孝之報

號州司戶王凝卒於官家素貧其妻李氏負遺骸携
其子以歸東過開封投宿旅舍主人疑其婦人而
獨携一子不許其宿李氏顧天已暮不肯去主人
牽其臂而出之李氏仰天長慟曰我爲婦人不能
守節而此手爲人執乎不可以一手并污吾身卽

引斧自斷其臂路人環視嗟嘆或爲之彈指或爲
之泣下開封府尹義之奏白其事於朝賜藥封瘡
厚恤李氏而笞旅舍主人嗚呼世間婦人不識廉
耻而污辱其身者甚多故錄此使知愧耻而有所
欽慕

劉曜獲晉散騎常侍梁繡妻辛氏辛炙色曜召見將
妻之辛大哭曰妾夫已死義不獨生且一婦人而
事二夫明公又安用之遂自殺曜嘆曰貞女也以
禮葬之

曾魯公以貝蛤之類人所不放而實活物命之多故常放之一日忽夢被甲者數百哀告翌日則有以兩簍蛤蜊爲獻者公立放之

唐詢家因煮鷄忽有火光出於釜中發蓋視之水面盡成五色有未產鷄子其黃化爲菩薩像袖手伸足眉目了然其白化爲蓮花座詢家大駭誓不復食酒官衛敦禮驗之不誣遂上於府安撫張尚書屬譚篆爲文以記之

安庭栢能迎意求合得人歡心尤好離間彼此雖至親密友庭栢處中無不立生悔吝蔡倫與張義最相善俄至絕交李中甫兄弟又同居無何亦起爭訟人皆知庭栢間之但不知作何等語而能使人遽相忿怨如此庭栢亦頗以此自負晚年兩頰連口皆害瘡言語艱難飲食尤苦如此狼狽數年方卒

人于胞胎中三元畜養九炁結形然後得成爲人若非三元所育九炁所導及九天司馬不下命章皆莫能生始一月受鬱卑無量天一黃演之炁二月

受上上禪善無量壽天洞冥紫戶之炁三月受梵
監須延天長靈明仙之炁四月受寂然堯術天礪
戶冥演由之炁五月受波羅蜜不驕樂天五仙中
靈之炁六月受洞元化應聲天高真冲融之炁七
月受靈化梵輔天高仙洞笈之炁八月受高虛清
明天真靈化凝之炁故一月精血凝而爲胞二月
形兆坯而爲胎三月陽神爲三魂四月陰靈爲七
魄五月五行分臟六月六律定府七月七精開竅
八月八景具神九月官室羅布十月氣足聲尚神

具九天稱慶太乙執符帝君品命主籙勒籍司命
定筭五帝監生聖母衛房天神地祇三界備守九
天司馬在庭皆所以主其生成者也因其不淨而
成胞胎神既入胎四種始立堅凝爲地種軟濕爲
水種煖熱爲火種氣息爲風種使地水火三種雖
立非風種關通其中則兒形莫得長故自一七日
至三十有八日於胞胎中自然生三十一種風關
通整合使之筋脉肌骨機關孔竅皆得流通于其
中間第十七日又復一死蓋短座之風吹令暴卒

以堅強之普門之風吹整其體足其音聲故也如此在胞胎中凡十箇月處母生臟之下孰臟之上五繫自縛如在黃囊如在羅網起不淨想瑕穢想牢獄想幽冥想起如是等想晝夜恟惶急欲起出母食多食少太膩無膩太熱太冷色欲過度當風差久游行馳走有所度越凡此之類兒皆不安亦復受諸苦惱及生地苦亦如之或以衣受或以衾受皆切楚痛當此欲生未生之際使非何所垂超之風吹令頭下足上以向生門則母子徃徃兩皆不保

王韶晚年頗悔取熙河時事嘗游金山寺以因果問衆長老皆言以王法殺人如舟行壓殺螺螄自是無心韶猶疑之時有刁景純者比韶爲前輩亦學佛多在金山忽一日與韶邂逅於長老坐間韶復舉前話以問衆答如前刁獨無語韶曰十八丈以爲如何刁曰但打過賢心下否韶曰不知十八丈打得過否刁曰以某所見賢打過不得曰何以知之曰若打得過自不問也韶益不自安後數歲發

背終日闔眼醫者告之曰看病亦當看眼色樞密
試開眼看韶曰安敢開眼斬頭截脚人有許多在
前月餘病劇遂卒韶未患發背前涇原知縣王直
溫一夕已就寢矣中夜有人扣衙門甚急曰請知
縣斷遣一公事直溫起燃燭坐廳明見一吏抱文
案并見數卒領一罪人至白直溫曰奉天勅令知
縣斷此王韶公事直溫熟視罪人頗殷肥矮矬其
吏宣判將王韶決脊杖配洪州斷訖直溫復歸寢
忽驚覺問其妻曰我何自起否妻曰爾睡甚快不曾

出直溫曰豈乃夢耶悟不復道明日以韶名字問
人或曰今樞密使王韶亦殷肥矬矮外無有者直
溫異之未幾果聞王韶罷樞密謫官洪州發背而

卒異哉

事見子
由語錄

一府帥得旨營治宮室以備巡幸帥意在媚上種種
必欲曲盡其佳嘗聚畫工作奇畫謂不得牛骨灰
塗壁則五彩不甚鮮明移檄所屬大有科索時推
官者頗有正見以劄子稟帥曰今所索太多期限
又急恐民間或至掘塚發棺則禍大矣帥方希賞

得劄大怒立將推官放罷自此無敢言者于是追
索日益急民懼罪殺牛馬以應又不足果至掘塚
發棺取人骨以代之

右武大夫趙公豐紹興丁丑以檄按蜀中諸郡兵歷
果州宿驛舍夜半一婦人散髮前訴曰妾姓解名
蓮奴李戶部家妾也戶部舊舍於此有女嫁郡守
馬大夫之子以妾從嫁妾有姿色爲馬郎所近有
娠戶部怒杖妾無數時妾尚有餘息戶部命掘地
倒埋妾屍覆以木床然李馬二姓亦以此遂微今

皆物故幸將軍掘出妾骨趙明日但爲設齋薦之
而去至潼州宿東關縣驛復見解氏哭于前則已
束髮矣趙怒曰昨已爲汝作佛事何苦復來相逐
解氏曰妾因感將軍恩然妾頂骨今倒埋在下非
發出正之不能生更望一言於縣守令出之妾得
生路其敢忘將軍乎趙許諾遲明專遣一使具以
其事懇果守王郎中王得書異之命訪求李戶部
舊日婢僕惟先卒譚詠尚無恙王郎中以十數卒
付詠令取出解氏骨詠恐事生不卽於其處出之

忽空中有聲責誅曰汝當時手埋我豈真忘其處也但更進前數尺發土見木床骨即在焉誅驚怖即為掘出其骨頂果在下見者莫不感傷郡為葬于別塋時馬郎者為東魯郡幕忽一夕解氏在前歷歷具道當時事馬倉卒仆地遂卒

果州教授
關若遜記

嚴君平卜筮於成都市以為卜筮者賤業而可以警衆人有邪惡非正之問則依卜筮而言利害與人子言依於孝與人弟言依於順與人臣言依於忠各因勢導之以善從吾言者過半矣每日閱數人得百錢足自養則閉肆下簾而授老子

侍郎孫公初名洪少時與一同舍生遊太學相約無得隱家訊一日同舍生得書祕不以示孫詰之生曰非敢隱也第爺書中語于公進取似不便孫曰何害某正欲知所避就生出書示之書云昨夢至一官府恍若閱登科籍汝與孫洪皆列名籍中內孫洪名下有朱字云於某年月日不合寫某離書為上天所譴不得過省孫閱書愕然生曰豈公果有是事乎孫曰有之向者東上在某州適見某翁

媪相詬求離某輕易爲寫離書初無他意不謂上帝譴責乃爾生曰夢寐恍惚亦何足信如公高才碩學俯拾無疑孫終怏怏及就試生果高中而孫下第方信前夢爲不誣也生曰某西歸當爲合之以契天心因問孫鄉所遇睽離人姓字尋跡其處得之夫婦俱未有偶生爲具道一段因緣置酒合之如初乃馳書報孫孫不勝感悅其後孫以太學內舍生免省歷躋膺仕屢典大郡所至有離婚之事未嘗不宛轉調護晚持從橐侍經闡達舉二丈

夫子亦同舍生有以全之乃公祇畏天譴之功也此事外舅何雅州親聆其說于公今錄之使人知所畏避云

劉貢父博學有俊才而滑稽善謔多所忤犯人皆嫉之貢父乃以自誇也臺官馬默嘗劾其輕薄不當置在文館貢父聞之遽言曰豈是馬默遽合驢鳴其所以口給者類如此晚年得惡疾鬚眉墮落鼻梁斷壞苦不可言一日與蘇公子瞻數人各引古入一聯以相戲子瞻遽言曰大風起兮眉飛揚安

得猛士兮守鼻梁。坐中大噓貢父，但愴感而已。自此益慚愧，轉加困劇，而斃蓋好謔人者，但知取快一時，不知一語中人，其酷甚於毒刃，尚安得望其

壽考終吉哉

事見落溪漁隱

王景亮與隣里仕族浮薄子數人結為一社，純事嘲謔。士大夫無問賢否，一經諸人之目，無有不被不雅之名者。嘗號其里為豬嘴關。元祐間，呂惠卿察訪東京，呂天姿清瘦，每說話輒以雙手指畫社人，日為說法。馬留時，邵篋以上殿，泄氣出，知東平邵

高鼻圈鬚社人，目為泄氣師子。王景亮又從而譎為七字對曰：說法馬留為察訪，泄氣師子作知州。惠卿大銜之，因諷部使者發以他事。舉社皆齏粉矣。蓋口之為業，非獨發人陰私，敗人成事，賈憎歛怨禍亦及之。

事見桐江詩話

廣西轉運王延範，本江陵貴家子，又富於財，嘗以豪傑自許，精於卜者如劉昂，則許之曰：君素有偏方，王霸之分，精於算者如徐肇，則許之曰：君當八少一，當大貴，不可言，精於風鑑者如田辨，則許之曰：

君形如坐天王眼如頻伽鼻如仙人耳如雌龍望
 視如虎當大有威德延範皆然之不知其言之不
 足據也於是日益矜負因寓書左拾遺書務昇作
 隱語諷朝廷事為人所告鞠實抵罪籍沒其家藁
 葬南海城外然則三子向者之說果安在哉大抵
 術人謬妄但知取悅一時不知誤惑於人其禍有
 至於如此者

事見楊文公談苑續出
葉石林巖下放言

樂善錄卷上 終

樂善錄卷下

宋 李昌齡著 明會稽商濬校

羅鞏大觀間遊太學有神祠甚靈鞏每以前程祈禱
 一夕夢神告之曰子已得罪于冥可亟歸鞏曰某
 生平無大過惡願聞獲罪之由神曰子無他過唯
 父母久不葬鞏曰某尚有兄何獨獲罪神曰子為
 儒者明知禮義子兄碌碌不足責也夢覺大恐是
 年果卒如此則葬豈可緩乎蓋送死人之大事停
 喪不葬子之罪也豈得安吉

事見夷
堅志

猩猩猿形人面容顏端正封谿山谷間百十爲群
共相語言灑灑可聽聞之者無不歛歛性喜酒且
好屐人因以張之猩猩一見乃知張已及其祖先
姓字必呼名罵曰奴輩故設此以張我邪酒屐於
我亦何愛而爾乃爲此我今捨爾而去爾將奈何
既而羣聚懽飲竟致醉倒取屐而着人乃掩羣得
之嗚呼酒屐之於猩猩亦猶利慾之於人也猩猩
知酒屐之禍已而不免死酒屐之中人知利慾之
喪真而不能超利慾之外但知猩猩之不能割棄

所好而不知猩猩亦將笑吾之念念戀乎火坑也

事見唐
文粹

秦少游云寶應民有婚娶會客者酒方半一客徑起
出門主人追之客若狂惑投身赴水主人急持之
良久乃醒曰適見一婦人以詩招我我倉惶就之
不知其爲水也因誦其詩曰長橋直下有蘭舟破
月衝煙任意遊金玉滿堂何所有爭如年去不來
休

李丞相沈厭榮利世務罕以櫻心所居陋甚不以屑

意堂前藥欄壞亦不問其夫人戒守者乃葺以試
沈沈終不以言夫人曰藥欄壞亦不問何也沈笑
曰安可以此動吾一念哉又請治第沈曰身食厚
祿時有橫賜固可營辦但佛家以此爲闕陷世界
我安得皆圓滿如意必求稱是沈終不聽臨終沐
浴左脅而化時大暑七日方殮絕無腐氣此可見
公踐履然今士夫鮮有不以外物動其念者事見類苑
錢公若水爲同州推官有富民走失一小女奴莫知
所在父母以訴州州委錄叅鞠之錄叅舊有求於

富民不獲遂劾其父子共殺女奴投水中法外凌
窘不勝其苦遂自誣伏獄具上于州州委官審覆
亦無反異獨若水遲疑錄叅詣廳詬罵曰豈公受
富民錢故出之乎若水但笑曰今數人當死安可
容易不熟察又越旬不決知州亦有語若水終不
奪上下皆恠訝一日若水詣知州屏人告曰向某
所以遲留此獄者蓋慮其冤嘗以家財訪求女奴
今得之矣知州驚曰女奴安在若水歸使人密送
女奴於知州所知州垂簾呼其父母謂曰汝女今

樂善錄
卷下
四
至還識之否曰安有不識卽揭簾推出父母喜曰
是也於是引出富民釋之富民號泣謝曰非使君
某一旦遂至滅門知州曰此乃推官非我也富民
亟詣推官求謝若水閉門不納富民遮垣而哭歸
傾家財飯僧以爲若水壽知州欲以其事聞若水
曰休也某初心正欲拔冤非敢希賞萬一敷奏在
某固好于錄叅却如何知州益加敬重未幾太宗
聞知驟加進擢自幕職不半年知制誥又二年爲
樞密時李繼隆與轉運使盧之翰有隙欲陷之罪

檄云八月當出師可速辦芻粟旣而又檄云八月
不利當以十月久之又檄云賊將入塞兵以時進
芻粟卽日取辦時芻粟已散倉卒不可集繼隆遂
劾奏於朝太宗大怒立命中使乘騎取三運使首
色甚厲無一敢言若水從容白曰候事狀明白誅
之未晚上意亦悟止黜爲副使旣而虜入塞事皆
虛繼隆坐是罷其招討

陳公洎爲開封功曹時童憲太后臨朝族人杖殺一
卒公當驗屍太后遣中使十數輩諭旨吏惶懼欲

以病死聞泊獨正色曰彼實寃死待我而伸奈何
懼罪而驗不以實乎爾曹但勿預吾當任咎乃手
自爲牘以白府尹程琳琳大喜曰官人用心如此
前程非琳所及亟索馬入奏雖大忤旨而公論歸
之旣而太后原其族人公亦不及罪自此遂顯名
不數年歷官臺省終於三司副使其孫傳道履常
皆以詞學爲一時聞人

符堅僭位以鳳集於闕欲大赦天下與王猛符融密
議於露臺時左右悉屏去無一知者俄而市井喧
傳堅疑語泄立命推究乃一黑衣小兒聲言於市
曰官今大赦人因傳之堅太息曰欲人不知莫若
不爲誠哉此言也始吾草赦時有一蒼蠅屢集吾
筆聲狀頗異吾已恠之今果漏語其黑衣者蒼蠅
乎

鄭朝議之從子娶陸氏伉儷甚綢繆鄭嘗於枕席間
謂陸曰我不幸死汝無得嫁汝死我亦如之陸曰
要共百年偕老奚爲出此不祥語居數年鄭感疾
自度必死臨終與陸對父母復申言之陸但俛首

樂善錄 卷一 五
悲泣鄭死陸竟携資改適曾工曹曾一日考試他
郡陸昏暮獨坐恍見一倅投書陸視之則筆札宛
然前夫手跡也其詞曰十年結髮夫妻一生祭祀
之主朝連暮以相懽俸有餘而共聚忽大幻以長
往慕何人而輕許違棄我之田疇攘資財而遂去
不恤我之有子不念我之有父義不足以爲人之
妻慈不足以爲人之母吾已訴於上蒼行理對於
幽府陸媿駭汗流未幾果卒

劉溫叟爲御史中丞時太宗皇帝尹開封知其貧賜

以五百千錢溫叟對使者肩鑰如故歸白其事太
宗嘆曰吾之錢尚不肯受况他人者乎亟命輦歸
以成其美臺憲故事月給食錢一萬不足則以贓
罰充之公惡其名不肯受一日太祖與太宗論及
朝臣之清節者太宗卽以其事聞太祖大加敬嘆
其子照同時爲贊善大夫燁爲龍圖學士自北齊
至本朝凡五百餘年而仕宦不絕

晁大傳迥前生是靜屈天主王待制素前生是玉京
黃闕西門侍郎楊文公億前生是武夷君陳康肅

公堯咨前生是南庵庵主張文定公方平前生是
山藏院知藏王丞相曾前生是青草堂和尚又如
王文正公旦自記前生身曾爲僧與房瑄太尉事
頗相似寇萊公準自言初生時兩耳垂各有肉環
七歲方合蘇文忠軾亦自言母夫人初孕時夢一
僧來投宿尚記其頽然而眇一目蓋陝右戒禪師
也

侯叔獻爲汜縣令縣多沒官田有一李誠莊方圍十
里河貫其中最爲膏腴佃戶百家皆成奧族舊估

值一萬五千貫未賣魏公當國又欲增價五千貫
買之陳道古銜命而求與叔獻議增其價叔獻堅
持不可道古以魏公之意諭之叔獻太息曰郎中
知此本末否李誠者在太祖皇帝時爲酒務專知
以不能救護官物爲溢水所捐估所捐當五千貫
勒誠償之是時朝廷出度支鈔預俵民間令買鵬
翎箭捍弓弩材木以備軍需及李重進叛方起兵
而預買之物皆莫集太祖大怒命一應負錢者皆
籍其產而李誠者實非預領官錢之人官吏畏威

莫敢開析一例抄沒至今誠之子孫一旦破碎情
相國不能恤其非辜給還其田莫若更捐價五千
貫俾誠子孫買之在官則已剩得五千官錢在誠
子孫亦不至狼狽郎中以為如何道古大驚曰某
初不知之審公此言苟利於人何所不可某亦有
以塞魏公矣遂捐價五千貫而去叔獻乃召誠子
孫諭之皆泣下拜曰實公厚恩奈家貧何叔獻曰
吾有策矣即召衆佃戶謂曰汝等本出下戶以得
李莊之利皆大第高廩變為豪民今官賣此田而

李孫獨患無力萬一為他人所得勢必撒廩拆屋
離業而去豈復容汝輩享其厚利乎曷若百家共
贖此錢俾李氏請買我則寬其限責如此則此田
復歸李氏而汝輩亦得久遠佃種兩獲其利不亦
可乎衆皆拜曰願如公言由是誠之子孫復得此
田矣叔獻亦以此知名不數年間遂得為工部判
都水監

宇文通奉府居近地一少年為縣壯丁治平改元五
月二十八日於道傍遇一老嫗携一竹杖挈青布

囊龍鍾不能行蓋關中人因游禮峨嵋至此偶感疾也少年逼令起行嫗曰我無他但心神煩悶得一杯水少沃渴肺即當前矣少年自以身爲壯丁慮嫗死爲累牽而投諸橋下里人莫不憐之是年六月一日適天雨大水屋材蔽江而下少年恃其善拍浮解衣赴水取薪而還既得復往人皆快之無何水勢增急少年力困不能爭遂以溺死洎水落家人訪其屍乃與向取投諸橋下老嫗聯爲一處其竹杖青衣囊反在少年之手雖其一時危急

不知手之取之以爭一旦之命然亦天意故以彰其報也通奉公目擊其事因爲傳之以示勸戒王進賢晉王衍女愍懷太子妃也洛陽亂爲石勒所掠舟次孟津逼以非禮進賢罵曰我皇太子婦司徒公女爾胡羗小子敢辱我乎即躍身赴水侍人名木出者亦繼死焉

潁川一異僧能知人宿命時歐陽永叔領郡事見一女妓口氣常作青蓮花香心頗異之舉以問僧僧曰此妓前生爲尼好轉妙法蓮華經三十年不廢

以一念之差失身至此後因郡會其妓女適侍立
在旁公因以僧語告之且問今亦曾轉妙法蓮華
經否妓曰某不幸為妓日事應接何暇轉經公命
取經令讀一閱如流宛若素習公益異之

文穎赴官江陵寓宿邸舍夜夢一人前曰我葬於此
氣轉地崩基半淹潰極陰積沍無以避濕願為改
葬不勝萬幸穎以夢寐不之信既而躄睡復夢其
人曰我苦於無告故來投君奈何無一念之憐乎
穎曰君墓何在曰今邸舍北十數步水邊枯楊樹

下是也穎駭異黎明驗之果然立為具棺瘞於高
塚

黃魯直好作艷語詩詞一出人爭傳之時法雲秀老
訶之曰公文詞之富翰墨之妙甘施於此乎公曰
某但空語初非實踐終不以此墮惡道也豈亦欲
置於馬腹中乎秀曰李伯時但以念想在馬腹墮
落不過止其一身今公艷語實蕩天下心使其信
以為然蕩而不反則踰越禮法冒犯廉耻無不至
矣罪報何止入馬腹定當入泥犁也公為之動容

王處訥獨臻星曆之妙依漢祖於太原開國爲尚書
博士判司天監舊與周祖舉兵向闕物色得之大
喜因從容問劉氏何以如是享壽短促處訥曰其
得數遠自以卽位後專復讐殺人又好夷人之族所
以怨結天下社稷不久周祖蹶然嘆息蓋是時方
以兵圍蘇逢吉劉銖二人第待旦拏戮聞處訥此
語亟命寬貸其逢吉已自經但誅銖而已餘不戮

一人

五代之君恣行殺戮視人命如草芥今日赤某人族

又明日赤某人族而欲望社稷之久可乎故梁自
高祖朱全忠于開平元年革命在位凡六年而爲
其子友珪所殺友珪復殺友珪而立又十年而國
亡唐自莊宗李存勗於同光元年革命在位纔四
年而邈佶烈擁兵向京師存勗遂爲郭從謙所殺
邈佶烈旣立是爲明宗在位甫七年而其子從榮
作難遂至不起旣而從珂殺從厚又三年而契丹
立晉自高祖石敬瑭於天福元年革命在位凡七
年而其子重貴立又四年而爲契丹所滅漢自高

祖劉知遠于晉開運四年二月辛未革命知遠次年正月丁丑逝世其子承祐立又三年而其國亦破周自高祖郭威于廣順元年革命在位凡四年而柴榮立是爲世宗雖能於五六年間取秦隴淮右復三關然亦果於殺戮故亦不旋踵而斃始自唐末至於國初上下凡五十餘年而天下爲梁爲唐爲晉爲漢爲周國命凡五革陳洪進初與張漢忠爲留後左右將從效死洪進推漢恩爲留後而已爲副使漢恩老且悞洪進實專其事一日有狂

僧行雲者謂洪進曰昔留公多疑人前後誅殺甚衆然不能害公者蓋公當爲此河主且人有千錢之祿者尚不可害况王者而可害乎但坦然任運則他日善終牖下子孫蕃盛若懷疑殺人則終當蒙不善之報鮮克令終矣洪進深以爲然凡帥泉十六年不敢妄殺一人雖犯極刑而情理可恕者亦行寬貸初廢漢恩諸子力請除之洪進堅持不可故漢恩得以壽終行雲聞而嘆曰陳氏五侯之報今于此而定矣及洪進歸朝改鎮福州其子文

樂善錄
顯為通州團練使文顯文顛文頸皆為諸州刺史
是為五侯一如行雲之言

陶穀性險惡好陷害人初自單州判官為晉相李崧
收用遂得入閣及崧歸漢徐逢吉有意害之穀乃
迎意構成崧事遂及族誅其後穀死塋於昭覺寺
墓門屢掩屢開寺僧復為築塞忽雷雨大作墓門
洞開無一物矣張舜民聞而嘆曰陶穀平生恃險
自謂其頭必當戴貂蟬今髑髏亦無矣

盧多遜亦任智數與韓王少暉毗及得志卽極口傾
之既而自取朱崖之行家籍於官未敗數夕前其
祖塋松檟忽為雷霆焚擊殆盡

王冀公性陰險而權譎巧於中人時同列雖已為公
所中終莫知公之中之翰林學士李宗諤有才名
王文正公欲引為參政先以告公公許之既而陰
以白上曰李宗諤欠王某錢三千緡今引用之在
索錢也蓋參政朝謝日賞給可得三千緡而宗諤
貧俸廩不足以給婚媾舊常有借于文正故公言
之因以中文正也及文正以宗諤薦則上果作色

而不從矣其巧於中人類多如此秉政日久四方饋遺不可勝紀金帛錢鏹圖書奇玩十倍于舊一日之間盡爲天火所焚無一遺者又無子平生所有一旦舉而歸諸他人如此則陰險權譎是有益於身乎

李伯時深得畫馬名法雲秀老謂曰此已可耻况念在馬死後必入馬腹不此爲懼而乃以誇諸人乎伯時懼然不覺身去坐榻曰微公言吾幾不免爲之奈何師曰但學畫觀音此念既專則彼念自薄

伯時大以爲然

黃筌及居家居寶貨名畫尤善翎毛常養鷹鷂寫其神俊養養既多供飼有闕不免掘鼠以給其後子孫有棄業而事田獵者有捕鼠而鬻于市者蓋習以爲常遂至如此又有好游妓館而子孫遂至荒淫取子奕棊而子孫遂至賭博亦習使然也大抵爲人父兄不可不正身齊家使子弟知有所法富商有段姓者養一鸚鵡甚慧能誦隴客詩及梵本心經段剪其兩翅閑以雕籠加意養熙寧六年

樂善錄 卷下
段忽繫獄及歸問鸚鵡曰我半年在獄極用怨苦
汝在家餵飼以時否鸚鵡曰君半年在獄早已不
堪鸚哥幾時籠閉豈亦不生怨恨乎段大感悟卽
日放之蓋鳥飛魚潛各其性也閉而養之彼豈適
其性哉向使段無許時囚禁亦未必肯信禽鳥之
性果以籠閉爲苦也

張道甫好養鷓鴣及青師姑以其鬪而不勝則怒拆
其兩足晚年兩脚害瘡伏枕累歲一夕覺癢甚爬
之則兩板皆已脫落蛆蟲擾擾盈聚其中其後尚

能令背負入市雖其躁悶然亦天意故以令於衆
也 又

有孫師韜者亦好養弄其鬪而不勝亦復如張怒
拆其足後染因病久卧床中兩股爲之肉破蛆虫
日去日有此皆鄉里近事人所共知其脚踏股破
者折足報也蛆生其中者必取殺虫也夫養弄之
人若積其平生所殺之數已自不可勝紀况捕之
與販之者其所殺可勝言哉

王雱性險惡其父居相位凡所爲不近人情事皆雱

從史之及爲從官則已不能朝矣未幾遂卒其父
一日遊鍾山恍見霧枷鐵枷杻鐵杻如重囚之狀
遂捨所居半山園宅建一寺以薦霧福

大尉劉文饒好行陰德視民如子一日賜卮酒醉於
上前醒乃謝曰臣非敢醉實以家奴驕縱畧加責
罵旣而入朝恐奴慚恚自殺憂心恍惚不覺如此
上益竒之


劉三復忽記三生前曾受馬身具言馬之所以苦者
在乎渴望驛而嘶渴也痛最切至者在乎傷蹄踏
着硬物卽傷蹄也傷則痛輒連心所以平生不忍
乘馬苟或乘之必爲時其水草至磽确處必爲緩
轡遇轍石則去之

江南國主鍾愛其女常從容謂大臣曰吾止有一女
資儀智識特異於人不可不爲擇佳壻須得少年
美風儀廣才學而門閥高者或曰洪州劉生爲郡
叅謀年方弱冠丰骨秀美又大門第嘗任貳師博
學有文足以充選主命召至一見大悅尋尚主拜
駙馬都尉鳴珂鏘玉豪華富貴冠於一時未周歲

公主忽告殂國主不勝其哀怒曰吾不欲復見劉
生其一官物不與遣歸洪州生恍疑夢覺觸目如
故丁謂當政日忽舉此以語客曰某他日亦不失
為劉參謀坐中失色幾未果有海康之行家籍於官
孑然南歸回視前日亦一夢也

淳于棼嘗晝寢夢一紫衣吏引自宅南古槐下入俄
至一城重樓傑閣金題其榜曰大槐安國既入城
又見一吏迎揖曰駙馬遠來且少憇於此此東華
館也居數日王引見一見大悅即以公主名瑶芳

者妻之未幾出典南柯郡政大舉王甚禮焉在任
凡二十年許生男子五人女子二人無何王卒方
悲慟間忽然驚覺乃知是夢立命發掘其槐下果
有一穴中有一臺色赤如丹二大蟻處之即所謂
大槐安國都邑也又窮其穴直上南枝即棼所典
南柯也棼大駭異復命掩之



Faint vertical text impressions, likely bleed-through from the reverse side of the page. The characters are difficult to decipher due to fading and the texture of the paper.

